

1 Pedro

1 Pedro Tyyriti

1 ¹Jiarỹ, Pedro warybe ritina rewahinyreri ubýtỹ deòdỹyna jiarỹ rare. Ibutumy judeu mahãdu-ò rewahinyreri Ponto-ò, Alaxia-ò, Apadosia-ò, Asia-ò, Bitinia-ò. ²Kaiboho heka iitxe itxemy toite Deuxu Inytybyreny-ò, Deuxu Tyytybytyhy araòbitinyrenyra, Jesuisi Kristu bityhnybenykemy tule tahãlubu-di arasebenyrenykemy. Wiòhedỹyna sòwemy ywina-wana adeereny kanakemy watzireri.

³Ibutumy àlana Deuxu Inynyrỹ tyby-ò rikiwahinyrenyke. Tii dori sòwemy ruxetòena inydeereny diwahinyde. Tai inyboho ixityre reamyhỹrenyre ratybienyrenykemy Deuxu sỹ mahãdu wo-ki. Inyboho wijile iraròsònareny dire, Kristu rubu-ribi rexixareki. ⁴Tii wiòhedỹyna wiwihikỹ inydeereny ririre. Biu bedekile riyrubunymy roire. Tiu rasunyòtyhy, retybyòtyhy, iruxerahakỹlemy lyrahakỹlemy roire. ⁵Deuxu tarurusòwe-di arayrubunyrenykre kia wiòhedỹyna bitabenykemy tetyhynyteki. Tarasana heka kia rare. Ikonanatxu Deuxu bedexiteòsinykre. ⁶Tai tahe beysabenyke. Bededỹynana tòbò reakreu, mabedewobenykre òsana aòmydỹynana sira òraru-ki. ⁷Tii tahe kawese-ki atyhydỹynareny ityhymy ròhònykre. Atyhydỹynareny womati tỹrỹrỹhỹkỹ òwy ratyre iòwy dire. Tiu rabinaòtyhy. Heòtyru-ribi womati tỹrỹrỹhỹkỹ ròhònyre wese atyhynareny kòdòhònykre àlana, wowydyna, luuna Jesuisi Kristu-ò, tii kedehemynykre. ⁸Kaiboho tuu tabitenyòte ihãrele tuure. Tetyhynytenyteri, tai tahe tỹxihikỹlemy deysatyhy-di ahãtenyte. ⁹Tai atarasadỹyna-di teteheteri, tetyhynytenyteki. ¹⁰Juhuu Deuxu rybedu mahãdu ritỹrãxinyra kia tarasanamy. Tule wiòhenadỹymy rarybere adeereny kanakemy. ¹¹⁻¹²Idi tahe dierydenyde ibededỹynanau kanaòkre urile ihewo-ribi kanakremy. Katahe adeereny reare Deuxu Tyytybytyhy nade òraru-ki. Ýju mahãdu dori tamywimy tuu rieryrenykemy ihỹrenyre. Jesuisi Kristu aòhòkỹmy dỹynanamy tule toosònadỹynamy rarybemyhỹrenyre, tiubedemybo kia kanakemy rijemyhỹrenyre.

¹³Arayky-ki birarutxynybenyke wereysana rara rotỹynymyhỹre wese. Òbitimy maraykynybenyke wiòhedỹyna-di bidimybedenykre-ki Kristu

kedehemynykreu. ¹⁴Wijile kaiboho ywimy nodu riðre wesemy boibeke. Iwese juhu aykaraðtamy tatÿÿnyny tatemahã wese noõmy, abedeerykõmy tatemahãu. ¹⁵Iweseõmy. Uritere adee rybedu òbitimy raremyhÿwesemy kaiboho ibutumy tuu botÿÿnybenyke kia-ki òbitimy boibeke. ¹⁶Raritinymy dori rÿire: —Òbitityhymy boibeke, jiarÿ dori òbitityhymy raremahã. ¹⁷Deuxu iny wiribi rihitxihitxinyre aõbina bina widÿÿ òraru-ki. Deuxu wiwese wesele iny luure tuu rarawetyynyõhyymyhyre. Iwese bodee textidenymahãte wese tamy bedeerykõ rira wese boibeke. ¹⁸⁻¹⁹Kia teerymahãtenynte tuu ararybekre. Ixinamy rexihumyhyredi aõkõ iwese womati tÿrÿrÿhÿkÿ iurahakÿ-di aõkõ atarasanareny riðwynyre. Tahe Kristu hãlubu-di aõhebo ibina botÿÿnybenyke-ribi textatenyta aõwidÿÿnabo booreny-ribi teerytenytaki. Kristu tahe budoeni òbiti lyrahakÿ wesemy rare. ²⁰Tii juhu bededÿÿnanau taumy rubu-ò riwahinykremy rexieryhyymy raremyhÿ, wijile kað nade rurukremy aluunareny òraru-ki. ²¹Tule Deuxu tetyhynymahãtenynte Kristu òraru-ki, Deuxu rubu-ribi riixixadÿÿnyre tahe tamy loosõna riwahinyre, tai araròsõnareny aityhydÿÿna Deuxu-ki roimyhÿre.

²²Kaiboho atytyby tesurõnanytenynte inatyhyna dori teywinytenyta. Tai tahe wiluuluutyhymy rakatxirenyke. Wiluumy wesenedÿÿrenyõmy atximahãtenynte. ²³Wiji umydÿÿna juhu wese aõkõ iny bòtòdÿÿna raumydÿÿre wiji tahe Deuxu Rybe aumydÿÿnamy ihÿre. Kia tahe ituerenyõtÿhy. Umytuedeõna diwahinyde. ²⁴Iwese ryberiti rarybere wese: —Ibutu iny asi wese rare. Inyloosõna asi noijesa wese rare. Asi ramoenymyhyreu tõjesa rejuxunymyhyre.

²⁵Deuxu Rybe tahe aõu aõuhyy rÿira. Rexihuõtÿhy rÿira. Kia rybemy tahe adeereny rarybemyhyre, Rybewihikÿ wahe.

2 ¹Ibutumy idi behuke ixi-ribi, aõbinatyhyna-di, rui-di, inywitxira aõmydÿÿna xibure-di aõ ikòkõmy ujõmo-di ibutumy. ²Tahe iwese tohouã howÿsy luure wese rybe-ò bexiborenanyke. Atytyby howÿsyna wese rare. Idi maumynykemy tarasana inatyhy-ò. ³Wanyrÿ dori wihikÿ rare. Kia teerytenynte. ⁴Tamy bodoibedenyke. Tii dori manairuhykÿ wese rare. Heto tira widÿÿdu kia mana-di rehura. Tahe Deuxu dee kia ixitarasanamy rare. Awimy heka tai rahare. ⁵Kaiboho tule mana iruhukÿ wesemy tõimahãte heto òbiti wesemy aijõreny-di kanaijedÿÿnydenykemy. Xiwena wedu mahãdu òbitimy boibeke, Deuxu dee wina xiwedÿÿna òbiti biwinybenykemy Jesuisi Kristu wowydynamy. ⁶Kawese dori Ryberitina-ki rÿire: —Betehebeny inihe Siaõ bede-ki iny mana heto tiramy iwidÿÿ wesemy ritidire. Tii aõwihikÿtyhy wadee rare. Kia iny rityhynymyhykeki, tiu raixÿruõtÿhy bede òtiidÿÿ ribedewonyõtÿhy. ⁷Kaiboho ityhydÿÿdu mahãdu, adeereny tii aõwihihikÿ rare. Ityhydÿÿdukõdu mahãdu dee tahe kawese tii rare: —Hetotirawidÿÿdu kia mana-di rehura. Kia mana tahe wiji juhuludu mana ritidimy roire. ⁸Tule ijõ kiamy rare: —Mana idireny kededesenykre. Kia mana awi aõkõ tamyreny rare. Reserenykre rybe ritxiõnymyhyrenyreki Deuxu heka riermyhyre reserenykre. ⁹Kaiboho tahe iny iitxese itxesemy aratareny, xiwena wedu mahãdu òbiti boibebenykremy,

inyijoi òbiti boibeke, Deuxu hõrõ mahādule, iruxeranamy marybebenykemy adee dori bededorohokỹ-ribi anadydenyde taloosõna wiwihikỹ-ò. ¹⁰Kaiboho juhuu inyijoi aõkõ toitemahã tahe wiji Deuxu tajioimy aratara. Juhuu ruxetõena tuu inyõ riwahinyõhyre adeereny, wiji tahe tii riwahinyra adeereny.

¹¹Waluuna mahãdu adeereny ararybekre. Kaiboho iwitxira bedeludu mahãdu wese atximahãtenyteki. Uritere òtaòtarenỹomy atytyby òludu dori kia rare. Atytyby aõbina dỹynana adeereny diwahinyde. ¹²Ahotiludu mahãduy-ki òbitimy boibeke. Tai omy ibinamy rarybekeki, tiiboho aumtyuedeõnamy robimyhỹkemy tahe Deuxumy kiditoosòdỹynadenykre Deuxu hitxidỹyna txuu.

¹³⁻¹⁴Bede dinodu bede ywina rybe biywinymahãbenyke Wanryỹ òraru-ki Iòlòrybe, aõbo kai deòdu rybewydydu aõbo ibutumy birarenybenyke. Iòlò deòdu mynyduhykỹ doidenyde aõbinahakỹ widỹydu aõhòkỹmy risỹnyny rimymy risỹdỹnykremy ritamadỹnykremy tule aõwihikỹ widỹydu riteàlãdỹnykremy. ¹⁵Aõwi wihikỹ widỹyna-di kaiboho hàbu bina biyrydỹnybenyke. Kia Deuxudeewi rare. ¹⁶Kaiboho hàbu ixihyyludumy ahãteny urile aõbina bina widỹyõmy boibeke. Deuxu deòduweselemy boibeke. ¹⁷Iny ibutumy iõsana biywinyke. Ityhydỹydu seriòre luumy boibeke. Deuxu biwowydnybenyke. Iòlò bede dinodu biwowydnybenyke.

¹⁸Deòdu mahãdu, awedu bityhnybenyke awedu wiwihikỹle-ò sohojile aõkõ ibina bina-wana dori bityhybenyke uritere bedetiidỹyõmy rỹiõmy. ¹⁹Aõbina riwinyõhyymyhỹre deòdu tawedu-ò. Tahe wedu teòdu-ò aõhòkỹmy risỹnyre. Deòdu riòludunymyhỹre aõmy rarybeõhyymyhỹre, Deuxu rityhynymyhỹreki. Kia wese tahe Deuxudeewina rare. ²⁰Iny raòrarunymyhỹkeki, tai tahe òhòtenamy inyboho ratximyhỹrenykeki, aõloosõna widỹyna bohe kia rare. Inyboho riòludunymyhỹreki. Aõwihikỹ widỹyna-di inyboho ywina-di òhòtenamy riòludunymyhỹrenykeki, kia Deuxudeewina rare. ²¹Kaiboho biòludunymyhỹbenykemy tai iitxemy aratarenyra. Kristu tule dori òrarureny-ki aõhòkỹmy rotỹnyre. Iwese timybo tii riwinyre wese kaiboho biwinybenyke. ²²Kristu dori tiu raòrarunyõtyhy, tule aõbinahakỹmy rarybeõtyhy, rariuiõtyhy. ²³Tamy adebure irãmy rryreuwobinamy aõkõ dirawyõnyde. Rihetenyreu, aõma aõkõ dirawyõnyde. Urile tii rexiwahinyre Deuxu dee. Deuxu dori òbitina-di rihitxidỹnyre. ²⁴Inyòrarureny dori riwyre itxeò nihikỹ tyre-ki. Tai tahe òraruna dee rakarurunyrenykre, tahe òbiti widỹyna-ò rakatximyhỹrenykre. Kristu wotõmomy iny riteytenymyhỹre. ²⁵Iwese budoeni reòsamyhỹre wese kaiboho toite. Wijile tahe kaiboho tòðemy atxiteny aitxeredu-ò atytyby wiòhedỹydu-ò.

3 ¹⁻²Hãwyyreny, ahãbureny rybe bityhnybenyke. Tai inyõ ihãbu ityhydỹydu aõkõkeki, tii kidityhnykre tahãwyyhe-ki, aõrybebo aõkõ roholareki ihe-ki robireki. ³⁻⁴Hãwyy ruxerana heka ixidee itidisirenyõmy atximahãbenyke aõ taumy-ki ritidimyhỹre aõkõ hãwyy ruxerana rare. Aõ iwo-ribi teysare, Deuxu Tyytybytyhy widỹyna inytyhyna tii tahe hãwyy ruxerana rare. Rade sihodỹytyhy ibutu ratyre aõkõ rare. Womati tỹrỹry noho tule aõkõre, tyy

wiwihikỹ-di rariamyhỹre tule aõkõre. Kia tahe Deuxu dee aõwiwihikỹtyhy aõkõ rare. ⁵Tule ihetxiu hãwyy òbiti tuu rotỹnyre, tahãbu riywinyre, Deuxu rityhinyre. ⁶Sara, Abraõ riðrese, tahãbu riywinyre. Itxi õhõtireny beake tawedumy tamy rarybere. Kiaboho hãwyyreny iriøre riøre atximahãtenynte. Tai aõwiwihikỹ widỹnany botỹnybenyke. Bededỹnana jei jei lau brebuõmy.

⁷Hãbu mahãdu, kaiboho tule asỹreny-ki abedeeryna biyrubunybenyke. Ahãwyyreny biywinybenyke hõraõmy idi ahãbenyke, tiiboho dori itxõmotxirennyre iruruõrennyre. Iõsỹny bityhynybenyke. Wiwana Deuxu ruxetõena tarasadỹydu atximahãtenynte. Tai aixitõedỹnany òbitimy bexitõenybenyke.

⁸Tahe kaiboho ibutumy widi mohõtinybenyke wiwesewesele. Ityhydỹydu seriøre dee tõena luuna-wana biwahinyke. Ruxetõena-di boibeke iny-ò ixityhydỹy aõkõ. ⁹Inyõ aõbinamy adee rakeki, ixidõwydỹõmy. Inyõ rybe-ki aõbinamy adee rakeki, irawyõdỹõmy. Wityhymy tamy marybeke. Kia-ò tahe Deuxu aõwiwihikỹ adee riwahinykre, tai ijõtxi Deuxu wityhynany adee riwahinykre. ¹⁰Tai inyõ tabededỹnanaluomy ratxike-wana, tatxuu teysamy ratxikeki, tahe dõrõtõ rexitaake rybe bina lau iry riyryke wobina rybe lau. ¹¹Aõbina bina-ribi bihenybenyke aõwiwihikỹlemy botỹnymahãbenyke. Ywina bijemahãbenyke ywina-di ahãbenyke. ¹²Deuxurue tahe òbiti mahãdu-di retehemyhỹre. Tanohõti tahe ixitõena-ò rijohonany ronymyhỹre. Aõbina widỹnadu-ò tamyreny ravarany idi retehemyhỹre.

¹³Kai aõwiwihikỹ widỹylemy tiu matxibekeki aõhe iny adee rotỹnyõtyhy. ¹⁴Kai òbitiwidỹy òraru-ki aõhebo bõtỹnykeki, deysamy atximahãke. Breburenyõmy iwese ilaureny ixidõhãrudỹyrenyõmy. ¹⁵Urile Kristu awedurenywesemy bisỹnybenyke aworeny-ribi. Inyõ adeereny aratỹyraxinyke-wana aõherekibo Kristu tetyhynymyhỹtemy, kai bexiywinyhy tamy ixidee rybena bydỹna biywinyhyymy idi ahãke. Arawyõdỹna ywina-di tamy marybeke iõsỹny bityhynany arayky òbiti-di marybemahãke. ¹⁶Tai tahe biixỹrudỹnyke umy ibinamy rarybekeki, tai dori òbitilemy Kristuko-txi tariamahãte. ¹⁷Tahe Deuxu dee wikeki, aõwiwihikỹwidỹy òraru-ki inyõ aõhõkỹmy rotỹnykeki, kia tahe Deuxu dee awi rare. Aõbinahakỹwidỹy òraru-ki aõhõkỹmy rotỹnykeki, kia tahe Deuxu dee awi rare. ¹⁸Kristu tahe sohojihyyle rurure iny òraruna òraru-ki. Òbitiwidỹydu tahe rurure òbitiwidỹydu aõkõ òraru-ki, kaiboho ruruweselemy atximahãtenynte. Deuxu Tyytybytyhy direki kaiboho iruweselemy atximahãtenynte. ¹⁹Kristu Tyytyby rara rotenawo-ò, tyytyby-ò ritỹnynany rarybeke. ²⁰Noe hãwõ nihikỹ riwinyreu, Deuxu riraõmy raremyhỹ urile hãbu mahãdu rityhynyõmyhỹre. Debõ inataõ reurõ inmy rohonyre rubu-ribi bera-ò rabõrõrõre. ²¹Wiji, kia sebedỹna ijyy wese heka rare. Tahe aõsebedỹna aõkõ iny tarasanare. Sebedỹna-ki Kristu rubu-ribi ixixana inyboho riteõsinyreri iny Deuxu-ò retehemyhỹre tarasana ritakemy. Bee tahe hãlubu surõdu aõkõ rare. Rexitõenymyhỹreki inywo rityranymyhỹre risuhõnymyhỹre. ²²Kristu tahe wijile biu bede ronyre Deuxu rurunawe-ribi tii ýjuboho, dinoduboho, rurunaduboho wedu Kristu rare.

4 ¹ Tahe Kristu taumy-wana aõhõkõmy rotỹnyre. Tai tahe iwesemy mohõtinybenyke. Inyõ dori aõhõkõmy rotỹnyre. Tai tahe òraruna-ribi ixiixãwididỹmy rõhõtinyreri. ² Tai kabede-ki iny bededỹnanareny uhe hãbu òta òtawidỹy nohõtina wesemy aõkõ rakatximyhỹrenyke. Deuxu deewina widỹna-ò rakatximyhỹrenyke. ³ Juhuu kaiboho sõwemy taòrarunytentye, iwese ityhydỹydukõdu mahãdu wiji rỹira wese. ⁴ Aòraru-ò biõwa mahãdu wiji bederiòtiinyre kai tii-wana taòrarunykõmahãteki iwese tiiboho naòrarunymyhỹdenyde wese. Tai adee ibinamy rarybemyhỹrenyke. ⁵ Tule tiiboho ywisidỹydu Deuxu-ò rirawyònykre. Idi dori òbiti ywisidỹy-na-di rihitxidỹnykre iru mahãdu, rubumahãdu wana. ⁶ Tai tahe inyõ ituekre mahãdu-ò Rybewihikỹmy rarybemyhỹre iumy dori rihitxidỹnykre ibutu hãbu wesemy. Tahe itytyby Deuxumy irumy rarekre.

⁷ Boholabeny inyhe, bededỹynana konana iõhõra. Tai tahe inatyhymy mohõtinyke Deuxu-ò òbitimy bexitðenykemy. ⁸ Ibutu ratyre wiluutyhymy atximahãbenyke. Kaiboho dori aluunadirenykeki wiòraruna-di itxerekõmy ahãbenyke. Inyõ dori iluunadikeki, wiòraruna-di itxerekõmy ihỹke. ⁹ Iny wixira dee awimy rỹira, roraludu isỹõmy rỹira aheto-ò bisỹdỹnyke. Bitỹhidỹnyke roraludu luumy atximahã. ¹⁰ Wii biwiòhenanymy ahãbeny iwese bede teerytentye wese biwiòhenanybenyke. Deuxu wiòhedỹydu wiitxura wahidỹydu wiwihikỹmy boibeke. ¹¹ Inyõ rarybekeu, Deuxu rybedile kana rybeke. Inyõ reòbykeu. Deuxu ruudile kedeòbyke. Tai tahe Deuxule loosõna kia-ribi kanatake Jesuisi Kristu òraru-ki ibutumy aõna aõna-di. Aõu aõu ibutumy ruruna, loosõna Jesuisi Kristu hõrõ rare. Kie.

¹² Waluuna mahãdu, ixibedeòtiidỹyõmy bede aõmydỹynana sira adee kanakreu. Kia tahe aõ brebudỹy-na aõkõ rare aõhebo adee kodotỹnykeki. ¹³ Tỹxihikỹlemy deysa-di atximahãke kia aõhõkõmy dỹynana dori Kristu aõhõkõmy dỹynana-ò biõwa atximahãte. Idi tahe tule kedeysakre Kristu loosõna òraru-ki. ¹⁴ Inyõ adee ibinamy Kristuni òraru-ki rarybekeki beysake. Kiau Deuxu Tytyby heka loosõna sõwe-di atyre-ki kanakre. ¹⁵ Kaibohoõ rubudỹyrenyõmy, wasirenyõmy, aõna aõna bina widỹyõmy, inywixira aõwysyna-txi ròte. Kiake-wana iòwydỹynamy aõhõkõmy botỹnybenykre. Tii dori wadee awiõre. ¹⁶ Inyõ tahe aõhõkõmy rotỹnykeki, ityhydỹydu rare òraru-ki tai ixruõmy mabeke. Urile Kristunimy riwowydynkemy idi rare. Bededỹynanahe rehemynymy roire ityhydỹydu mahãdu-di rihitxidỹynanymy riteranykemy. ¹⁷ Tahe inydee ywisidỹy-na ritelenykeki, timybohe Deuxu Rybewihikỹ ityhydỹydukõdu mahãdu-ò kòdòhònykre. ¹⁸ Ryberiti-ki roimyhỹre kia: —Òbiti mahãdu dee tarasana isirakeki, timybohe òrarudu mahãdu ròhònyke. ¹⁹ Tahe inyõ Deuxudeewi òraru-ki aõhõkõmy rotỹnykeki, Tatytyby Deuxu-ò rawahike tahe aõwiwihikỹ widỹmy rareke. Deuxu dori aõu aõu iny widỹydu rare; iny wiòhedỹydu rare.

5 ¹ Ityhydỹydu-ò itxeredu mahãdu-ò aritohonykre ararybekre. Jiarỹ tule itxeredu-ò rare. Kristu aõhõkõmy rotỹnyre, jiarỹ tuu rabire. Taloosõna kiditedòsinykre jiarỹ awana wataxire tewebromy rikitarenykemy. ²⁻³ Biwisinanyke

aityhydỹydu butuna iwese itxeredu budoeni-di retehemyhỹre wese idi beteheke. Ixideewimy kia biwinyke. Inywitzira deewimy aõkõ. Aõ nieru tarasa sohojilemy aõkõ, ityhydỹydu wiðhedỹyimy. Aõ ityhydỹydu wedu wesemy aõkõ bisỹnybenyke, urile bexideõsinyke iwese ityhydỹydu òbiti rỹira wesemy. ⁴ Tahe itxeredu mahãdu wedutyhy kedehemynykeu, tii adee kidiwahinykre loosõna araheto. Tii tiu toosd ixãwiõtityhy. ⁵ Itxeredu mahãdu tỹmyra bierybenyke itxeredu mahãdu matuari-ribi widee ixiwedeõmy ahãbenyke. Ixiwede mahãdumy dori Deuxu rarawetyynymyhỹre. Ixiwede aõkõ mahãdu-ò tahe ruxetõena riwahinyke.

⁶ Ywimy ahãke Deuxuru-ò iximy xiwedeõmy. Tii dori bede òbiti kanakeu akanaloosõnykre. ⁷ Aõmydỹyña witzira witzira biwahinybenyke Deuxu-ò tii dori arawisinaymyhỹrenyre. Anawiðhenanykre. ⁸ Bexihãrubenyke aòludureny Satanasi-ò. Òbitimy mohõtinybenyke. Tii dori leaõ reburemyhỹre wese rare. Tii rariarerimy ihỹre tibo riròkemy. ⁹ Atyhynatyhy-di idi bexiumynyke. Aityhydỹydu seriõre-dori awana aõhõkỹmy rotỹyñreri kia ixiradỹyduhukỹle-wana. ¹⁰⁻¹¹ Iny Deuxu ruxetõenatyhy rỹire. Kaiboho urihimyð aõhõkỹmy botỹyñnybenykeu akanawiðhenanykre, akanarurudỹynykre, akanaòbitidỹynykre, anajohonadỹynykre. Ibutumy ruruna ihõrõmy aõu aõu rarekehymy idi watximahãre.

¹² Kia waryberatiyla Sila-wana adeereny riritinyre. Tii iny seriõreny òbitityhy rare. Jiarỹ rarybereri kia Deuxu wiðhedỹyña inatyhy rare. Kaiboho idi tyhy mohõtinybenyke. ¹³ Kowa hãwyy Babilonia hãwã ludu tule tarybe weityhyna adee diwahinyde. Tii tule itarasana mahãdu-ò. Tule wariõre Marku arãrybeweityhynanyrenyre. ¹⁴ Widee buðbenyke narybewehityhynanyde. Ywina adeereny kanakemy watxireri Kristu tetyhynmahãtenyteki.